

四庫全書

集部

欽定四庫全書

集部

端明集卷

十四至
二十

詳校官庶吉士臣朱理

檢討臣何思鈞覆勘

總校官進士臣朱鈐

校對官中書臣劉圖南

謄錄監生臣周元濬

欽定四庫全書

端明集卷十四

制誥

皇后曾祖妣制

勅朕以純孝事親至誠饗帝躬執牲玉造於郊廟均界
嘉福敷於四海眷坤儀之重寶相祠事追賁曾世厥惟
舊典皇后曾祖妣武沈雄志尚超邁風稱馳於藩屏

宋 蔡襄 撰

勲業著於戎韜儲積善謀延施來裔嚮以椒闈之貴襲
疏圭壤之封屬此明裡易居全魏克章告策英鬼其承
皇后曾祖母魯國太夫人制

勅朕裸於太室奠於崇丘非惟薦馨德於神天亦以興
民孝行矧予宮壺助有齊明申用愍章以慰誠篤之至
皇后曾祖母某氏志尚惇淑令則柔嘉蚤專德慶裕延
遠妣后德之大前啟國垂統徐方以均禧奄魯邦而
賜履靈其未昧歆是典常

皇后祖曹彬制

勅王者嚴於祀事而齊明之志必有申朕肅於郊廟均
福天下眷惟后德每懷恭止

闕

首及焉皇后祖

彬材畧絕世資性本仁佐我祖宗戡定海寓功烈明於
日月慶賞延於帶礪然兵戎之舉專尚寬平而陰施之
隆乃生嘉懿唯覩天之正儷實本祖以開祥屬牲玉之
熙成荷龍光而賜慶惟王英哲尚或欽承

皇后祖母制

勅朕祠郊丘登侑三聖既伸孝於祖考唯我儼德潔神
助相申賁先烈用慰誠心皇后祖母挺生慶門嬪偶華
族柔明之懿動鑒圖則世有陰施挺生令孫正位椒塗
景象軒緯追榮祖室前綏翟章屬禋燎之上闕封之
大字有光泉安尚克歆承

劉叅政曾祖景洪贈太子少保再贈太子太保
制

勅饗親於廟饗帝於郊德誠忝香並獲嘉貺實於弼輔

贊相熙事追恤曾廟所以廣施慶之澤具官某曾祖某
稔善在躬儲慶自遠丘園肥遯行義著聞祐啟胄孫與
謀幾政屬竣精祀申用愍章加保護於儲宮極光華於
壤樹管篋如在尚或承之

劉叅政曾祖母追封清河郡太夫人曾氏再追
封榮國太夫人制

勅德厚者其流遠位崇者其數異朝家典故二府柄臣
凡更郊祠重褒家廟上延曾世茲惟舊矣具官某曾祖

母某氏靖嘉厥德淑慎其儀嬪偶時髦儲載陰慶貽孫
之訓逢辰乃享孚佑哲人協調宰路嚮因巖廟之任前
啓郡田之封建此精禋特申愍典胙休城國光耀幽途
尚爾淑靈時克歆鑒

劉叅政祖熙贈太子少傅再贈太子太傅制

勅朕休于太室禋于中壇祖考格臨神天歆顧乃惟臣
鄰莫不追慕先烈不有褒禋曷以慰其孝心具官某祖
某世美敦於儒雅德名被於鄉邦善慶之蓄而載於當

年陰施之厚而貽于後嗣萃厥孫謀之令階夫柄用之
能屬奠玉之精裡申納書之愍典惟榮私廟侈命大門
進春坊輔導之聯為祖服光華之寵式將孝告尚或歆
承

劉叅政祖母追封安定郡太夫人張氏再追封
康國太夫人制

勅朕薦瓚先廟則慈顏升配炳蕭陽位則厚祇合脩故
於台輔均禔王妣則孝行於上下而恩覃于幽顯矣具

官某祖母某氏嬪儀表世婦則承家助施厚德之祥終
啓孝孫之慶六珈之飾前被于懸章千乘之封進荒於
大國推榮私闕永賁幽局

劉叅政父素贈太子少師再贈太子太師制

勅郊以事天配侑祖考唯朕誠心罔有不肅推是感恩
及于大臣追揚前人之烈則孝治興矣具官某父某德
尚高舉行美純茂樂於名教訓以清白慶靈之績似續
其昌挺生暖良叅論幾務寵推先正師表東朝顯耀家

開幽通隧路噫一禮之舉褒渥上延朕於承疑眷意良厚

劉叅政母追封瑯琊郡太夫人顏氏再追封沛

國太夫人制

勅人子飭躬盡節以位於朝者莫不欲顯榮其親以示于世故郊澤之行首被台路申於愍典所以盡人子之志也具官某母某氏鑒訓圖史躬勤組紉蚤儷宗儒回瀋陰慶誕生哲嗣叅輔宰庭嚮登郡賦之隆未極國田

之峻屬備儀於吉土爰徹壤於大邦併疏慶渥之華庸
為德施之厚

孫副樞曾祖鶚贈太子少保再贈太子太保制

勅朕薦黃流之瓚內以宗世室之嚴升紫燎之煙上以
旅泰元之重蔚精誠之升聞沛神靈之來格倚賴鄰臣

協申顯相延愍思於曾廟表厚慶于高閔具官某曾祖

某躬善鴻猷代嚴清訓膺材智之美而闕四用行義之

譽而隆為素封介爾孫謀參予闕三帷字欽柴之典用推

飭壤之恩追元良保護之關三光華之寵

字

孫副樞曾祖母追封太山郡太夫人開氏再追

封太原郡太夫人制

勅登吉土之壇展精禋于上帝御中天之闕敷德施于多方乃眷輔臣追榮先廟具官某曾祖母嘉柔成德淑惠有儀作合高闕克供時祀慶源來而自遠根本固而必蕃惟顯孫之賢參右府之命助相精享格擁鴻禧首推錫類之仁進列啓邦之寵篆章告策識典其歆

孫副樞祖植贈太子少傅再贈太子太傅制

勅朕託王公之上懼德不逮祇享天明風示海寓惟我
輔弼贊祠郊丘霈恩大門用均福貺具官某祖某學術
名家材資命世惠澤施于邑治陰慶萃于孫謀進與斗
樞之庭寶相泰元之時甫成熙事首及褒先即朝寧之
孤卿列元良之上傳愍章中告幽隧載華

孫副樞祖母追封汝南郡太夫人周氏再追封
河間郡太夫人制

勅朕入清廟陟圓丘奉三后之侑則念及人之親享百
福之貺則思逮下之惠矧我樞度之哲有懷王妣之慈
申此愍章以飭幽窆具官某祖母某氏性範雍莊閨儀
嚴勅嬪令人於冠族儲善德於後昆再世寢昌四鄰登
用嚮有納書之祿已躋徹郡之榮逮竣事於大神復徙
封於名壤併疏異典用慰管魂

孫副樞父丕贈太子少師再贈太子太師制

勅國家之重者無大郊廟之祭脩物盡志咸適於度非

唯臣工克有顯德以贊陟降抑亦先正之有善訓俾爾
習蹈于禮故舉褒典追揚風劬具官某履道冲粹懷材
浚明世美寢延德施憑厚若稼而必穡若構之有堂嗣
子惟良筦予機柄屬周蒞祀享用恤章儲官師訓之嚴
家廟寵靈之渥推本昭孝斯朕意焉

孫副樞母追封河南郡太夫人周氏再追封江
陵郡太夫人制

勅予既念臣工之先正能訓其子以相予祀稽合禮舊

用東朝公袞之命以祿之又念其配必有令美助成德
慶敷錫恩典用均嘉貺具官某母某氏世族高華天資
淵靜柔儀循於家節懋行服於諸宗有子之賢為國之
棟向殄年於嶺服旋登仕於樞庭會陽時之畢儀究幽
阡而漏澤疏常安之名壤慰聖善之淑靈朝渥甚隆尚
或歆荷

孫副樞母追封清河郡太夫人張氏再追封京
兆郡太夫人制

勅尊榮其親所以勸人子之孝敦厚其行所以勵臣下之忠朕祠郊丘推澤台輔追褒禰室顯大慶門具官某母性照賢明躬循法度繫祖以奉先祭璜珮以謹聞儀積施慶靈誕生材哲方贊幾微之務適陪蒞契之禋恤及慈闈相攸樂壤更賦上田之數霈䟽幽隧之榮

程相公曾祖新贈太師制

勅立人之道各親其族故廟焉以祀其先馭臣之儀必有等威故貴者特異其數朕景至嚮天澤延四外唯是

相臣祔之曾父於禮不亦重乎具官某曾祖某潛德內
充英稱遐驚垂清白之訓奕世其承涵積累之祥哲孫
斯復方一相以處外舉三事以褒先會郊時之上儀進
師垣之峻秩阡塗雖閟尚鑒恩靈

程相公曾祖母制

勅朕吉旦執牲幣以饗帝列侑祖考所以教諸侯之孝
矧惟元老實在陪輔握施之大宜及曾世具官某曾祖
母某氏賢和循度淑惠有儀早儼宗儒勤宣婦順深覃

福施之美佑迪胄孫之良列于公台撫是蕃服向啟大
邦之賦已崇象服之榮會畢明禋再荒全晉漏恩阡樹
靈懿其膺

程相公祖贊明贈中書令制

勅朕有耆哲之老總將相之權以綏近輔方予饗帝而
不得與於籙俎其心豈不在予左右故追褒慶典無間
宰庭抑明注意之重具官某祖某奕世隆禮秉躬尚儒
儲慶淵回啓福緜遠若壙之高其址必大若木之遂其

本必固發於再葉登為上公眷祖服之迪祥極帝師而
舉祔屬中壇之峻事陟右相以推榮亶然松阡之華歆
茲耇卣之告

程相公祖母制

勅朕臨崇丘

闕

薦吉玉帝監芳潔神格熙富嘉應雜還

羣靈歡欣思與宗正共承其慶具官某祖母某氏柔範
表于姻族遠鑒燭于箴圖來嬪哲人協布陰德有孫賢
令列于台儀追嚴王妣之封更陪輿地之數大邦其徹

幽夢惟歆

程相公父制

勅自天子下達至行之美莫先乎孝朕裸七室於廟侑
三后于郊思予舊相之重極爾昊天之感追榮稱世以
慰其心具官某父某材智出人而甚遠德業在躬而至
優陰施積於高閭福祉萃于詒嗣登叅鈞軸列于宰司
裡祀甫成神富均被按輿圖之美號占書社之上游穰
有上公之圭告用文人之策恩榮叢至魂爽尚知

程相公母制

勅有國之慶不及于家孰謂之澤有子之榮不貴其母孰謂之孝朕薦享上帝均覃釐貺首念良弼追褒慈妣所以示等數而推恩禮也某母某氏賢德本於天資儀度隆於壺範挺生詰子登列上台往臨申伯之藩外處邵公之相會休成於熙等特申用於袞章再開國田大隆廟服歆茲愍冊用慰柔靈

張宣徽曾祖厚贈太子少保制

勅國家禮成郊丘澤被寓縣而於臣鄰之先咸有典數
其褒及曾世者非二府近列不與於斯所以重其事也
具官某曾祖某蚤仕華途交辟幕府猷為之美屈於當
世德託之慶發於來嗣祐孚孫胄登與哲科陟元戎之
壇提四貴之印頃陪禋薦寶罄齊明舉家廟之禋章踐
儲宮之保護納書告策榮耀無窮

張宣徽曾祖母制

勅具有邁臣以郊燔之慶用東宮保護之秩褒其曾前

並乃眷其配宜崇小君之號于其私廟榮名稱焉具官
某曾祖母某氏性由禮檢得劬嬪風鑒于圖史之良躬
夫繁藻之祀慶儲當世利澤後人爰啓令孫實登近輔
適中壇之紀事念曾世以推恩徹名壤之風峻副筭之
秩九原而在其慰爾心

張宣徽父固特贈太子少師制

勅水積者其流無窮德厚者其施必遠有能儲慶顯右
其嗣是必推恩以及其先朕迺以祇見泰元敷澤海寓

唯予近輔舉祕先正以慰孝心具官某父某文業敦美
材資浚明風稱著於朝闈慶利覃於嗣續有象賢之哲
登近貴之途相我上儀成夫絜祀顧稱官之清履升儲
保之榮名天日光華下燭幽窅

張宣徽母制

勅朕薦七室於廟侑三聖於郊祖考降臨孝誠昭格眷
予近輔莫不有蓼莪之感昊天之嘆近褒慈妣昭顯令
德具官某母某氏早繇榮閥來嬪德人儀度肅於閨闈

教歲刑于姍族助儲陰施孚哲慶基頌緣子姓之榮前
徹郡田之號裡柴甫畢恩露載敷特崇象服之華并胙
名邦之履寵榮之渥世嗣其昌

樞密使王德用曾祖方贈尚書令兼中書追封
許國公特贈太師晉國公制

勅大臣家廟通於三世所以異禮等而示天下故下之
著明再筮機政申祕其先以慰其志具官某曾祖某立
誠介特懷道寬冲爵命嗇于當年慶祉遺于來嗣惟乃

孝孫之令入居右弼之崇追顯曾門爰圖成國允矣帝師之重炳然祖服之華流裕無疆啓祐爾後

王德用曾祖母畢氏追封韓國太夫人特追封魯國太夫人制

勅山嶽之所以施利澤而不竭者以其涵蓄之深厚理勢然也故盛大之室原其慶祉有自來矣具官某曾祖母某氏有雍洽之慈儀具方柔之靜德內修壺教遠祐孫謀兼將相之榮實邦家之賴眷夫曾妣嘗治大封建

冠斗樞之崇彌加象服之貴脂田益衍幽祕永承恩數
斯隆尚克歆荷

王德用祖玄贈尚書令兼中書令追封曹國公
宜持贈太師齊國公制

勅朕涓吉旦告廣庭以登元老冠于宥密又稽典舊追
榮祖服大其私門所以視持絕于臣鄰也具官某祖某
德載當年慶流來裔有孫之令為邦之光出奠藩服則
當注意之隆入輔帷幄則有伐謀之勝惟其大父之廟

錫乃上公之珪兼令紱以居崇陟師垣而益重徹治四履履冒全齊阡塗之幽無昧歛享

王德用祖母路氏追封陳國太夫人宜特追封
某國太夫人制

勅君子修身無忝其祖固為孝德之美而况登冠弼輔
追榮上及豈不為存歿之光乎具官某祖母某氏華望
蓋世美行在躬合姬辰髦積埤善慶再世彌大薰相是
崇眷惟王妣之慈向啓國田之賦相攸越重顯命惟承

王德用父超贈開府儀同三司太師尚書令兼
中書令封魯國公宜特追封燕國公餘如故制
勅予有耆德之臣越自外相入冠宥密方將倚辦謀明
協濟幾務是用追榮先廟以重寵數具官某父某材略
沈雄志氣忠厚昔事先帝實董元戎風美悚天下之聞
德施存後世之大惟乃令嗣蚤與樞庭忠勤一心出入
二紀近跡陪輔專在老成宜申祔於禰官特進荒于大
國上公之袞實琢其章載煥幽阡莫大斯祉

王德用母朱氏追封榮國太夫人宜特追封吳國太夫人制

勅弼臣之重等數之大固絕于衆登拜伊始追繼其先所以明朕眷倚之厚具官某母某氏挺生令族來嬪峻賢蘋蘩以觀法度之成圖史以規德訓之美裕然基慶紹厥世勲有子之英久相于外比因節名爰冠樞謀申愍冊於慈闈畫鉅封於樂國全吳之壤斯以詔榮

山南東道節度使同中書門下平章事賈昌朝

曾祖母栗氏可封韓國太夫人制

勅朕薦瓚先廟則慈顏升配燭蕭陽位則厚祇合脩故
於台輔均祔曾妣則孝行於上下而恩覃於幽顯矣具
官某曾祖母某氏嬪儀表位婦則承家助施厚德之祥
終啓孝孫之慶六珈之飾前被于懸章千乘之封再荒
於大國推崇私閥永賁幽局

端明集卷十四

欽定四庫全書

端明集卷十五

宋 蔡襄 撰

制誥

新除宰臣梁適祖文度皇任齊州禹城縣令累
贈太師中書令可贈兼尚書令餘如故制

勅易稱積善之家必有余慶聖人之論豈苟而已朕每
延登宰輔財成教化者必褒顯前人追用愍冊既榮其

家然後可以倚辦國事具官某祖某德望粹美行實惇
深疎拔之才蟠錯而不掄臠沸之泉淵渟而必決回擁
陰施啓佑令孫諮以謨猷寘于鈞軸逮茲登用之始旌
夫奕世之勤即內史之崇階陟中臺之總錄漏恩幽壤
光顯慶門管魂有知其享予之休命

梁適祖母追封榮國太夫人衛氏可追封闕國
太夫人制

勅人臣所以貴於當世者惟爵命之差故居宰府于其

始也追榮三世之命示特絕于官師而表輔相之重也
具官某祖母惟爾孝孫嘗貳機政固已啓大國之封而
列小君之號今正鼎席助成萬務稽尋禮舊申叙封壤
疏恩至厚以光華於阡表而發揚於裔嗣靈其鑒茲

梁適父顯皇任翰林學士右諫議大夫累贈太
師中書令可贈兼尚書令餘如故制

勅近以宰輔虛席擢任叅貳以政其位朕念被命之際
入陟帝庭則陳道注委之大退款家廟罔不興劬勞之

感非有愍章追冊何以發揚其先烈而慰安其孝心乎
具官某父某以文業之茂中乎選首以才德之劬登于
禁塗蘊澤利之資而屈於當時積陰施之厚而施于後
世厥有嗣續弼于政機甫茲調燮之初眷夫詒燕之遠
稽考典故申命褒榮陞冠文昌顯賁幽宓嗟爾九原之
魄歆予三事之崇

梁適母追封安國太夫人閻氏可追封國太
夫人制

勅進登宰路者所以共治天下而於其家必極褒崇者
非特慰夫幽塗亦以伸人子之榮遇也具官某母天性
靖嘉禮度雍穆挺生華閥嬪儷哲夫以淑慎之美而表
於壺儀以敦嚴之訓而勵于子姓肆爾令嗣陟于台司
誦勤劬而發詠蓼莪申恩賁而益陪湯賦進徹大國舉
成愍章壤樹之華斯其至矣

宋觀文祖制

勅朕於羣公褒其先廟所以勉子姓之勤大其私門所

以切邦朝之助爰諏吉旦對越上靈竣事均釐莫如舊
弼申褒祖服用慰孝心具官某祖某道充於中材浮於
仕善政之澤遺思在人陰德之流餘慶及後啟孫謀之
方重登宰路之猷為往于藩宣適此禋祀追榮王考舉
錫公主爰徹樂國之封永賁幽阡之寵

宋觀文父祀制

勅天子祀七世而祭上帝其禮莫與為大公卿乃有家
廟以伸時享朕裸清明之宮奠泰元之坐升侑三后丕

薦孝誠念予大臣罔不懷其先正肆于慶澤均被褒襁
具官某父某性尚冲粹識照高邁材美不曜磐于幕府
德回復貶于子舍厥有令嗣登予上哀均逸陪京之輿
述職大神之祀再荒名國中賁禰官兼隆特引之儀併
為追遠之數英魂不泯歆是愍章

宋觀文妻制

勅朕禮成帝時澤通海宇念予股肱元老往服藩政既
榮其躬又推而及其室所以表恩章之良厚具官某妻

某氏服儀德閼嬪儷宗工隆為世範而有家節之嚴助
成賢業而有邦光之美向繇台席之命前治國田之封
逮已上儀復申異數按於輿地錫以名疆恩渥之蕃勿
忘祗荷

富觀文母韓氏封華原郡太夫人制

勅朕嚮清廟登泰畤雖祖考歆侑孝誠上達然念劬勞
之德欲極天下之養莫可得已故於近輔有承顏朝夕
者首數慶澤非特循典故異恩禮之然抑予心之思推

而下及也具官某母賢惠本于天資儀度隆于閭範誕生詰嗣嘗貳樞庭惟是忠誠率繇善訓逮茲裡鬯之舉申錫慈闈之封徹祝輿圖畫治名壤於為人母而觀厥子之有立於為人子而及其親之恩年又茲寵渥之蕃疇及私門之慶

張端明父制

勅具官某父某朕饗清廟登泰畤雖祖考歆侑孝誠上達然念劬勞之德欲極天下之養莫可得已故於近侍

首敦渥澤其有承顏慈聞者優異恩數非特典故之然
抑予心之思推而下及以爾涵德靖溫不櫻俗累長厚
之行率于鄉國清白之教嚴于家庭有子材賢服于禁
近願回種嘗推奉親慶嘉其志尚重茲美遷官職陟芸
書之清階品被銀章之美祇荷榮命永懋忠訓

太子太師致仕杜衍可依前太子太師致仕加
食邑七百戶實食封二百戶制

勅朕齊明祇栗躬執牲玉以事宗廟上帝神天鑒格蒙

獲福應四海內外歡欣交通眷惟曩輔實助予德敷厥
恩數以將厚意具官某以清修為身檢以忠藎為國謀
昔正台衡進退以道歸休里閭誠心不懈泰元修報慶
澤周洎矧惟舊弼望隆天下增埤邑賦之實復累功號
之美併示優寵往服休命

樞密使給事中王堯臣可金紫光祿大夫依前
給事中充樞密使仍賜推忠佐理功臣勲封實
食封如故制

初朕親執牲玉祇饗郊廟人祇歡欣慶賚周浹惟予弼
輔大臣與圖機政陪侍祠事兢兢齊栗不有恩命曷以
章寵數之厚具官某自登宥密蚤夜悉心以持國論罔
不忠蓋而於幾事區處中理材賢之稱著在時議適講
禋燔之禮竝推渥澤之異陞級彌峻爾其懋哉

王觀文制

初朕以純孝事親至誠享帝每歷三歲躬造廟郊神界
嘉福四海入安顧于適臣齊精奉祀不有慶澤曷以將

夫厚意具官某材資端茂行實清峻嘗與機政久參國
論比延經業之美復陪講學之奧適已燔燎均賚澤惠
增衍田賦追承勲衛寵數之異勿忘祇報

給事中充集賢殿學士向傳式可加食邑三百

戶制

傳一作傳

勅朕齊明祇栗躬執牲玉以事郊廟神天鑒格蒙獲福
應澤賚之行周于寓內況予近列奉祀于內述職于外
宜有恩數以彰寵異具官某材資沉厚履尚修飭蚤登

省闕休有風猷留視宮鑰益彰才稱中壇展報慶自近
始增徽輿賦之奉序升陞品之榮勿忘欽承以載光寵

王尚書制

勅朕臨海寓庶品安久且三紀矣惟祖考畀予大憲惟
上帝祐予嘉應乃仲冬吉旦裸于廟奠于郊所以薦誠
而大報又念臣工之有竭忠純以輔予善者不有慶澤
曷以章夫厚意具官某惟爾先正克休令聞執憲中臺
參論大政厯踐都座為時顯人爾以端方厚重而資之

稟於先覺向所履者咸紹前人相儀精裡率繇儀度衍之井賦楸以勲衛貤于而家以昭世德之美

端明殿學士兼龍圖閣直學士張方平可加上
輕車都尉食實封二百戶制

勅人主上事郊廟下臨士民理適厥中茲謂興治朕越丁卯享於道祖翌日裸于太室又明日執牲幣以見上帝已而赦天下大賚內外百執事推舉名典況予近侍所宜先焉具官張某汝以文業登禁近以端毅主典憲

以通智總轉流之計以善惠布藩宣之政逮茲祠事職奉常顯大正左右助相以成熙事念爾賢勞躋升勲號增埤賦封欽哉服予之休命

端明殿學士給事中程戡可加上護軍食邑五百戶翰林學士呂公綽可加護軍進封開國

關

食邑五百戶制

勅朕齊明祇栗躬執牲玉以祀郊廟神天鑒格蒙獲福應澤賚之行周于寓內況于近列奉祀于內述職于外

宜有恩數以章寵異具官某才資方重履尚修飭蚤登
禁密休有風猷鎮撫蕃屏益彰材稱泰元展報慶自近
始增衍邑田之厚進列勲號之榮厥恩茂焉勿忘祇載

王珪制

勅朕入清明之宮親泰元之祀祖考天地況施無疆厥
有秉文之士左右顯相而熙福之蕃嘉與均被具官某
才資敏茂行實端方興學切於本元懿文美於訓令回
翔禁近光顯名譽速嚴事於崇丘常先途於法乘奉珍

璫於七室貢吉玉於中壇祀容雍和志慮齊栗序升階
次疏列社封並為寵渥之華益表褒甄之異

王贊制

勅具官某文美中於科等言亮登於諫垣將漕朔陞有
幹給之勞糾虔都獄有矜平之稱屬以躬祀泰畤奉引
皇途甫終享帝之儀均施敷天之賚併增階次兼衍賦
封寵數優隆勿忘祗飭

殿中侍御史呂景初可上騎都尉制

勅祖考昇予以基統故祿芳於室以達孝恭天地相與
以施生故升禋于丘以報本始粵爾羣辟肅雍在下福
應之格嘉與共之以爾早繇風飭擢居臺憲論議有風
亮之節彈治得糾繩之中侍陪禋享顯相齊明載升勲
級之榮益表朝恩之茂

皇親大將軍遙郡制

勅昔我祖宗聖神以有天下付畀於予惟是孝誠以克
保久親執籩簋見于郊廟宗籍羣工莫不齊明以奉祀

事庶幾敦于善行成于美化况慶賚之行予何啻焉具
官某天資相厚濟以學術肅雍助祭率繇禮度勲階升
賦用勸親賢汝其念之無懈夙夜

步軍副都指揮使范恪可加柱國進開國公食
邑五百戶仍賜忠果雄勇功臣制

勅朕以仲冬吉日祗事丘疇陟配三后祀秩百神諸福
之物擁佑來格均施之澤宜自近始具官某智略之明
而濟其忠厚武材之勝而守以惠和精練事經周旋信

遇擢總勾陳之重益修拱衛之嚴自法輅之啓行訖泰壇之峻事天宮有謚蹕路無譁顧是忠謹用推慶賞勲名功號率躡等夷益虔乃心以永來譽

皇城使內侍省內侍押班陵州團練使武繼隆
可加食邑三百戶制

勅某朕練時日記泰元躬事壇丘執薦遵簋百靈歆留
番畀永福念惟官師陪侍兢臬敷與鴻惠以昭慶賚以
爾材脩煩使志務恭飭總司禁省親邇軒闥自臨陽時

還御端闈夙夜之勞彌用信倚進疏公社益埤國田良
恩施之行毋忘祗荷

左驥驥衛內侍省內侍押班鄧守信可加食邑
三百戶制

勅具官某國家接千歲之統考一陽之元受記於羣靈
輳熙於遠極眷惟近從當被茂恩以爾天資深淳學識
優卽久于軒墀之列夙司省禁之嚴時飭樂文相承裡
意比信宿於所在警夙夜以居中衍陪邑賦之蕃益表

拜榮之厚勉思祇載毋懈乃心

入內都知張惟吉制

勅具官某識慮靖深才資敏卽久處近密號為修節總
涖禁省動循典憲朕于仲冬祇見郊廟馨誠達於上下
熙福被於動植爰念行次訖于竣事衛翼恭肅禮容備
順夙夜之勤時乃信倚躡升勲級益埤賦封恩數之蕃
勉荷褒澤

禁軍都虞候已上及藩方馬步軍都指揮使并

御前忠佑南郊加恩封贈父母妻制

勅朕迺者祇事泰元均施熙貺被于四表惟茲信倚之
職董齊有衆勤于夙夜乃有恩恤之典以及其先示顯
榮于當世具官某姿氣沉毅材略周敏積儲陰施之大
導發福祥之遠惟是子姓實司戎紀逮終陽時之禮特
賁稱官之祿進秩環衛漏恩阡陌靈爽不昧尚承厚澤
勅迺者祇祀泰元均施熙貺惟茲信倚之職實有致齊
之勤惟榮私門用盡子志以爾姿器魁毅氣尚沈雄嗣

續之強服

關十字四字

予列校逮終陽時之禮進陞環衛之華

歆承茂恩永耀幽窆

右竝父制

勅有國之慶不及于家孰謂之澤有子之榮不貴其先
孰謂之孝朕薦享上帝均覃隆貺首念爪牙之倚追褒
慈妣所以示表恩禮之厚也具官某母氏賢惠本于天
資儀度隆于閭範誕生子舍訓總戎鈐或陪

關十字一字

成於

熙典特申禔於愍

關十字一字

冊用慰柔靈

勅某母某氏貌虎萬旅實予爪牙向祀中壇垂慶方夏
眷惟信倚之厚宜有褒恤之恩以爾賢惠本於天資儀
度隆於梱範乃繇子舍特啓縣田靈其嘉承佑爾後嗣

右並母制

勅朕肅恭神祇慶賜方夏百工上下咸受均福豈惟內
德之邵亦有合姓之賢宜於壺中申明褒渥具官某母
某氏柔儀閑淑德性端和儼威服於衡璜循采蘋於祭
祀仇飲君子總則和門會郊澤之推榮俾湯賦之有沐

勅具官某朕肅見神休覃施寓縣下逮和門之職率褒
合姓之賢以爾淑性端莊柔儀閑婉米嬪遵於禮則作
德謹于閨風久敦中助之誠克著宜家之譽陽時方成
於熙事脂田特啓于大封恩慶其承益務恭順

右竝妻制

諸軍班都虞候制

勅報本丘郊敷澤海寓念和門之總衆扈法乘之啓行
天策無諱蹕路載肅或成防于邊圉亦均被于恩榮並

加綸綍之華益堅忠孝之志

防禦使錢晦母制

勅朕以天正吉日躬執玉幣薦于郊時神畀蕃釐予弗
自有推而被于臣下四鄰之近達于朝著既澤其身又
穉其生廟所以表恩意之厚矧夫忠孝之家詵然嗣續
願還慶賜推奉慈妣其可已耶具官某母某氏惟乃君
舅克有順德實啓王國逮于福偶翊冠樞宥作相于外
肆爾有翟章之華湯邑之大丕顯厥德今泰壇已事嘉

乃子舍之請徹壤千乘申是愍冊禮非常等揭為封樹之寵靈其承哉

禮部尚書中書門下平章事梁適姊故度支員外郎直史館洪鼎妻保定縣君梁氏可安康郡君制

勅朕祿清廟奠泰壇非惟薦馨德於神天亦以興民孝行而輔弼羣公有能含貞予美輟閨門之慶施于近親朕甚嘉焉具官妙生於華閥而天咨哲淑嬪于君子而

壺儀雍肅惟爾悌弟以台宰之重相厥裡事願回祿典
祇授女兄列封華壤正名小君休哉光榮之澤賁寵而
族

樞密副使孫沔妻母制

勅朕自郊還居行澤萬里輔弼之重恩數最隆因而延
請罔違其志具官某妻母氏世族甲冠資性賢明克儷
令心章著美德時乃子婿登于樞庭齊明侍祠首被慶
渥願上私門之賞推奉外黨之榮徹封邑田褒顯阡祿

天光下燭神爽其歆

新除樞密副使孫沔妻可追封郡夫人制

勅在召南之詩列公侯之配興鴈鳩之均一言其恩逮
下也執纁黼而祭祀言其動有禮也唯是爵位之崇不
有賢婦助成其美則無以表于有衆具官某妻某氏生
於華閭歸而宜家稟言容之修觀圖史之奧今沔擢在
樞宥為予輔臣爾貴以夫當有加等郡田徹封象服異
制爾其荷寵數服訓辭勿忘柔嘉以永休于福祿

兩制兒男制

勅具官某男某天以陽為元德施生煦養而百昌蕃廡
人主憲之故有恩賞褒慶之事朕裡于帝時而澤渥淪
漬覃施四表矧爾近侍奉祠述職罔不恭顯俾而子舍
或其支屬登榮仕版著名京寺勉自修進永克祗荷

待制王居白女可封長安縣君制

勅具官某女惟爾父行實清修列予近侍嚮陪泰時之
祀常奉閔宮之嚴推是慶恩屬于息女載疏肅露之澤

特徹汾田之封渥命甚華賁于私室

司天監五官正制

勅具官某學通精伎職在天部朕因景至有事郊丘瞻
考祥禋特乃相予澤行百工罔間內外進以階次厥恩
茂焉

中書錄事以下制

勅某禮事貺施光被四外矧麗西省咸有關掌均行邦
澤之厚序升郡采之次祗服恩渥務勤祗飭

京官等加恩制

勅具官某朕祇見上帝而百工之列或內與齊祠之肅
或外叅職貢之幹悉條恩渙均被矜貺爾誠節服是
褒寵

蕃官加恩制

勅具官勲等十二所以詔勞僭稽秩序行慶賞示恩信
也以爾大順存心奕世嚮化率其種落護我邊陲比因
榮望之誠誕夫蕭澤之遠錫爾勲級永服嘉寵

端明集卷十五

欽定四庫全書

端明集卷十六

宋 蔡襄 撰

奏議

言災異一

臣等伏見自春至今四方亢旱日蝕地震變異相仍有以見上天垂意於陛下至深至厚臣不知陛下何以報天戒之貺乎臣聞古之人君遇一災異循省修飭或以

六事自責或避正殿不居或減膳徹樂或遣使巡察求
直言于朝究愁苦于下於是轉灾為福者有之矣若天
之戒告之不懼民之冤隱之不求乘饑旱之會其變不
可量也伏望陛下避殿減膳以自修省仍降詔書戒勅
百官各舉厥職遣使天下求訪闕失或有官吏貪殘而
不糾刑獄冤枉而不治賦斂繁數而不均徭役頻仍而
不息孤獨無所養流散無所歸朝廷之惠不逮于下萬
民之情不達于上皆得條奏而施行之伏惟陛下鑒前

王戒畏之理觀當世安危之勢留意而行天下幸甚

言災異二

臣等近以亢旱請行自古帝王消弭災譴之術避殿減膳發詔書遣使者上以答天戒下以慰民心數目顯然德音未降臣聞天地之氣與人相通陰陽不和本自人召今若不修人事則無以回天意而名至和伏自兵興累年天下困弊外有三邊百方仰給之卒內有四海億兆愁苦之人方此公私匱乏之時必無拯拯災異之力

將來流徙必衆盜賊必多患至後患恐無所及況朝夕
以來祈禱未應人心如涸天意益高陛下為蒼生憂念
非不勤臣等為國思慮無不至凡人有可為者皆勉而
為之以拯災害况避殿減膳發詔遣使此乃典冊常行
之故事帝王修省之盛美伏望陛下早賜施行苟能下
悅人心自可上消天譴

言災異三

臣等伏覩陛下以災變屢見飛蝗為殃責躬引過祈于

天地宗廟社稷不令殃及萬方臣伏念災變之來實由
人事政治闕失感動天地故古之人君或遇災異則避
正殿撤常膳深自刻責思所以致之之咎改之之理以
至冊免三公者有之詔求直言者有之此皆消災異召
和氣之道也方今天下之勢至危矣外裔驕暴凌脅中
國盜賊縱橫驚剗郡縣養兵至冗擇將不精配率頻繁
公私匱乏內外之官務為辦事而少矜恤之心天下之
民患於供應而有流離之苦治道如此未聞救之之術

臣等伏見數年以來天戒屢至朝廷雖有警懼之意然而因循舊弊未甚改更今日災變頻數蓋天意必欲朝廷大修人事以救其患乃可變危為安也救患之方莫若原其致災之本致災之本由君臣上下之闕失也闕失之事臣等敢次第而言之陛下不專聽斷不攬威權使號令不信於人恩澤不及於下此陛下之失也持天下之柄司生民之命無嘉謀異議以救時弊不盡忠竭節以副任用此大臣之過也朝有闕失而不能救民有

疾苦而不能達陛下寬仁少斷而不能規大臣循默避
事而不能斥百官邪正並進而不能辨四夷交構內侵
而不能謀有願避之心無力諍之節此臣等之罪也今
陛下既有引過之言達于天地神祇矣伏乞陛下必踐
其言必行其實踐言行實之要莫若專聽斷攬威權號
令信于人恩澤及于下則災異消而和氣應矣某大臣
不舉職之過伏乞陛下以致變之由赫然督責之若督
責之又無近效則用災異冊免三公故事而去之別求

能賢以救大患如臣等蒙陛下非次選擢不能稱職尚致陛下有如此之失大臣有如是之過臣等負罪至深伏乞朝廷速加竄逐求方正材識之人俾居諫職必能裨贊朝綱上副聖選臣等謹具狀待罪以聞

言災異四

臣等伏見陛下以災變屢至責躬引咎憂勤至切臣等究災異之來蓋由君臣上下皆有闕政是致內外空虛民力彫耗怨毒之氣干動至和所以數見災咎臣等脩

位諫列無所補益再有陳奏乞加竄逐待罪多日未聞
朝旨臣等切慮朝廷以災異所因上下引過不欲專罪
臣等然臣等自念昨蒙陛下于衆人之中非次選擢當
時物議謂臣等必有建明臣等協心期于必有報効觀
今天下之勢日可憂懼天人災變相仍而至豈非臣等
不能補助之致也或朝廷不欲深罪臣等即乞各與外
任合入差遣庶盡心力以展實効又朝廷別得賢才使
居諫職必有謀畫以助朝政臣等謹具狀陳乞以聞

乞罷迎舍利一

臣切聞開寶塔為天火焚燒因發塔基取舍利入宮中
嬪嫔煉臂削髮者甚衆喧傳滿街無不驚駭又聞以二
十二日大具僧儀迎舍利歸寺臣聞救天下之患必有
濟時之術施行之事若憑依神靈以要福利是為非道
也今令僧徒迎舍利自禁廷歷都市萬人瞻觀衆口傳
道下惑民心上虧聖德取笑無窮非細事也所有迎引
舍利伏乞寢罷官嬪煉臂削髮亦望嚴加禁止

乞罷迎舍利二

臣昨日竊聞宮中因取塔基舍利入內宮嬪嫔煉臂落髮者甚衆及擬二十二日大具僧儀迎舍利歸寺臣已具奏聞乞賜寢罷尚慮至誠未能上回聖意臣聞治天下之道匡生民於富壽皆由教化刑政修舉以臻太平至於非禮之福不可徵求況奉佛無効前世甚多臣竊見唐文宗時常令僧百人於宮中念誦謂之內道場每有西蕃入寇令講仁王經以至人事不修羌戎犯闕至今

言大厯紀綱弛壞皆由事佛之致也舍利有光前世有之何足為靈今天下生民困苦四夷驕慢陛下正當修人事救時弊若專信佛法以徼福利豈可得耶陛下設置諫官本為規正過失今迎引舍利事出於中專損陛下聖德臣終夕不寐臣言為是如能妄行威福臣犬馬之軀全當咎罪所有開寶塔舍利伏望指揮送還本寺不令迎引

乞罷迎舍利三

臣等今見左掖門外僧衆廣作威儀迎引舍利都人會
集甚駭物聽臣甫臣稟自昨夜二更至今日卯時連入
文字乞賜寢停迎引舍利免至有損聖德即今却去外
面廣作次第臣等切慮必是僧徒交結陛下左右之人
張皇其事誇惑都人因此勢力別圖財利至于光怪之
事多是妖僧所為若果神靈所憑豈有天災可及事理
甚顯不足信奉伏乞陛下速賜指揮寢罷迎引威儀只
令送還本寺

乞罷修開寶寺塔

臣數日聞迎引舍利歸開寶寺臣始疑之必以為無有此事屢以為言乞賜寢罷不蒙聽納今又聞民間傳言皆謂陛下欲重修開寶寺塔伏念陛下必以邊事為憂必以蒼生為意豈肯枉費施于無用然慮僧徒妄引靈怪以惑聖聰臣請悉推意而盡言之或以舍利有光引為靈驗臣謂浮屠舍利之所居不能護惜天火所焚一夕而盡豈可謂之神靈枯久之物灰燼之餘或有光怪

多亦妖僧之所為也或以此塔太宗皇帝所造理須修
復臣謂昭應宮上清宮皆先朝所置天火一空已不復
修孰有非議若有禁中共出資財不費于官不擾于民
臣謂一塔之費數百萬錢一錢之資皆生民膏血當此
多事匱乏之時豈可虛費若施于土木果有福利以之
助軍須少寬民力此豈獨無福利哉況天災所焚大示
警戒陛下當修人事以報之今大興功役是以人力而
拒天意也伏唯陛下聖詔聰明必無此議人言不已臣

實憂疑所有開寶寺塔如有乞修復者伏望陛下特加
深罪以絕欺妄

乞追還孫氏

臣伏見皇族宗鼎妻孫氏禮度不修髡辱膚體屏棄外
郊以厲失德臣竊謂於繫獄之初陛下審得其狀即賜
之自決於義猶不失今乃暴陳其惡著在民間指斥譚
賜飭以重宗枝之醜而損風化之美也臣聞詩曰縣縣
葛藟在河之許夫葛藟之為物生于水涯則蒙潤之延

茂喻王之同姓被恩之甚美也春秋之法為親者諱其
惡夫惡之名聖人之所深嫉然而隱者務敦睦而此宗
族記稱公族有罪鞠于甸人夫甸人掌郊野之官治公
族不于市朝而屬之甸人者蓋隱之耳昔漢梁王有罪
為有司所按驗谷永上書以為帝王不窺閭門之私且
汙蟻宗室無益於治體於是梁王獄寢不治伏惟陛下
覽詩人廣恩之義繹春秋隱惡之道稽周典之要根漢
臣之論而蒙覆宗屬虧忠撓法於道無所容者以義奪

恩不得已而誅之若宮奧昧之事宜勿究明必爾章
章然不可掩者亦借託法之不斥其本末以傳四方務
以疏厚澤而敦善化也其孫氏乞追還京師安置以息
羣口臣疎遠蒙陋不應與論國體誠有見聞莫敢隱默
幸陛下悉察臣昧死再拜上

端明集卷十六

欽定四庫全書

端明集卷十七

宋 蔡襄 撰

奏議

乞寢罷唐介春州之命

臣今月十九日祇候伏見臺官唐介上殿奏對次宣喚
兩府論事及令唐介付臺文彥博留身再拜次又樞密
院奏事聞唐介得春州臣在殿陛之間所聞雖不審實

竊料唐介必是上言執政間事得罪春州然春州惡地
唐介臺官今言執政而得必死之謫雖陛下優待大臣
而執政何以自安伏緣唐介獨言宰臣所以兩府同列
各處嫌疑之地不肯解救臣伏望陛下少霽天威以全
國體追寢唐介春州之行臣官為正言又在侍從耳目
聞見不敢默默臣死罪具狀奏聞伏候勅旨

乞罷溫成皇后立忌

臣伏聞陛下為溫成皇后立忌臣竊謂聖人制禮所以

明輕重尊卑之節過與不及皆曰失禮故太常設官職
在檢詳陛下臨御天下三十餘年動遵典法聖德之盛
明如天日近者溫成皇后薨逝事不下禮官詳檢既以
施行雖有過當無由追改又按立忌考之于禮未為適
中伏以孝章淑德章懷四后於陛下為伯祖妣為皇妣
其屬之尊如此向來奉慈皆不立忌溫成皇后生則為
妃後乃追冊於陛下為卑幼之列不應立忌伏望聖慈
追還勅命庶乎天下之人知陛下以禮斷情合於中道

乞不往奉先寺酌獻

臣伏覩太常禮院公文十二日駕幸奉先寺詣慶基殿酌獻蓋陛下孝思之心不憚所至然外人唯見向來奉先未嘗親往今為溫成皇后陵廟成就恐因而謁廟臣竊料陛下聖明必不為此臣恐獻議之人不知典禮願陛下深思熟議以慰人望取進止

乞罷園陵監護司

臣伏見貴妃近用溫成皇后監護葬事稱園陵監護使

及都監始者衆議皆云便去西京又來已於奉先權攢
恩禮脩至附近京城歲時易為照管外邊人言尚疑有
西行別作園陵口語紛紛於事體非便伏乞明降聖旨
中書溫成皇后已權攢畢所有園陵監護司一切並停
所貴曉諭外人取進止

乞不作溫成皇后誌文

臣奉聖旨檢閱溫成皇后莖要誌文臣遍檢古今並無
皇后莖禮更有誌文蓋以名號已尊兼有哀冊不合為

誌臣別具狀條載唐以來故事伏乞聖慈省覽所有御制更不可作取進止

乞罷呂夷簡商量軍國事

臣伏見前宰相呂夷簡被病以來兩府大臣三次詣夷簡家議事及守司徒罷相之後朝廷有旨令商量軍國大事今月二日宰相得象以下又詣其家評論西事臣切謂夷簡病時陛下於內中開設道場及賜手詔錫與至多眷注之心當世無比臣謂陛下假人以恩則可

假人以禮則不可何哉陛下春秋方盛固宜親決萬幾
却令宰臣樞密詣夷簡決事臣恐天下四夷聞之謂陛
下如何主也兩府大臣輔陛下而治天下者今乃並笏
受事於夷簡之門里巷之人指點竊笑臣恐天下四夷
聞之大國乏材而無上下之名分雖陛下特隆恩眷優
待老臣正得為君之道而夷簡不能上承陛下之意而
無引避推讓之心夫為人臣端居私家屈大臣而自便
於理安乎況夷簡謀身忘公養成天下今日之患遂致

二邊連構百姓困窮萬手所指無敢言也上天降鑒祖宗垂靈輒以病解而陛下尚令參決大政皆陛下至今未之悟也臣切以陛下即位之初夷簡便為叅知政事其後數年漸至宰相出陳州半年復入又出許州一年有餘移領魏府召歸作相首尾二十年間不居政府纔二年有餘耳前後雖有王曾李迪張士遜陳堯佐王隨等更迭為相而歷年之久無如夷簡也輔政以來所言之事陛下皆聽信而施行之出藩未幾還當大政以

病居家兩府問事得主之深無如夷簡輔政既久得主
又深固當敦風教正庶官安百姓鎮四夷今乃不聞功
業但為私計豈不負陛下眷遇之意也夫開直言旌讜
論者宰相之體也夷簡執政以來屢貶言者凡三四次
如曹修古段少連孔道輔楊偕孫沔范仲淹余靖尹洙
歐陽修等或謫千里或抑數年或緣私恨假託人主威
權以逐忠賢以洩已怒殊不念陛下虛受惡名此不忠
之大者又使天下之人父教其子兄教其弟咸以直言

為諱此乃絕忠謹之嘉謨成本朝之闕政其過一也夫
獎懿行厲廉節宰相之方也古之聖人教人之道先以
名節為本若使不好名則何惡不為何善不毀縱不
陷于惡亦不免碌碌因循為闕茸之人也夷簡為性不
臧欲人附已見為善介特而自立者皆以好名希求富
貴以污之善人恥此往往退縮以避好名干進之毀是
以二十年來人人不肯尚廉隅厲名節淺者因循闕茸
深者靡惡不為都無愧耻但能阿附夷簡夷簡悉力護

之使奸邪不改浸成此風俗以為習又使天下之人皆以逐利為智能遠勢為愚鈍此乃廢廉耻之節成奔競之風其過二也夫善則稱君過則稱己宰相之行也夷簡一恩之施皆須出我門下或先露其事使人預知或先抑其事然後與行若不可行者小則歸怨同列大則稱奉聖旨以是阿附者多陰為羽翼使天下之人迷大公之論有朋黨之議其過三也夫進賢退不肖者宰相之職也臣見數年以來審官院京朝官吏部銓選人樞

密院三班院使臣授官之後例皆待闕一年二年以此計之冗官甚多曾不裁損奇材異績不聞獎拔貪墨昏耄之人曾經免罷責罰及來雪理務施少惠多與收錄使天下貪廉混淆善惡無別其過四也夫富國恤民宰相之事也自關陝兵興以來修完城壘饋運芻粟料配百端悉出州郡內則帑藏空虛外則民力殫竭嗟怨嗷嗷聞于路道不幸有水旱之災其變不可量也蓋由不選材能充三司使副使發運使但務取人情用為資歷

纔轉運使收至數月即又遷移循環奔走日求升進欲以興材利寬民力其可得乎其過五也夫懷忠誅逆宰相之畧也而邊鄙無事之時臣僚或陳備邊之策或述禦寇之方皆為虛妄引惹或降差遣或與衝督邊臣因此唯尚姑息是以士卒不練器械不完黠羌窺我強弱輒懷異志夷簡當國之後山外之敗任福已下死者數萬人豐州之戰失地喪師鎮戎之役葛懷敏以下死者又數萬人蓋命遣將帥或分或合法制不立上下不和

大戰則大敗小戰則小敗使生民肝血塗染砂磧父子夫婦存歿冤痛廟堂之上成筭安在其過六也夫暢國威制鄰敵宰相之謀也自西師敗歿之後北人乘隙遣使入朝輒違先帝之盟妄請關南之地歲增金帛僅二十萬而猶勒兵壓境堅求納字凌脅中國大為恥辱度其禍福譬若疽瘡但未潰耳制敵之術為患日深其過七也夷簡出入中書且二十年不為陛下興利除害苟且姑息以致事事隳壞如此臣謂夷簡若實有智謀執

政從來只務固寵不肯施設是不忠也若竭盡智謀區
處顛倒是不材也不材不忠二者當一責尚貪威勢不
能力護或必聞夷簡乞令政府一兩人至家商議大事
足驗夷簡退而不止之心也臣又見故相王旦執政僅
二十年後以病退只帶宮觀使名不復與聞邦政故事
甚明其夷簡伏乞朝廷特罷商量軍國大事庶使兩府
大臣專當責任無所推避陛下於夷簡正君臣之分存
終始之恩伏乞陛下斷而行之以全國體取進止

乞罷王舉正用范仲淹

臣伏以當今之務至要至切者莫若擇執政之臣執法之臣苟容不材欲百職修舉者無有也切見叅知政事王舉正材能最下久忝大用柔懦緘默無補于時天下之人指目羌虜為患兵戈未寧生民困窮國賦貧蹙陛下豈不念祖宗社稷之重國家安危之計而令舉正碌碌備員自陛下擢用韓琦范仲淹以來人人日期大任韓琦仲淹見已到闕若以處置邊事韓琦足以當之乞

移仲淹叅知政事其舉正伏乞退罷以叶公議

再論王舉正

右臣近論述叅知政事王舉正柔懦緘默無補於時特乞罷退樞密副使范仲淹才名德望素著於人乞叅知政事或者以謂若用仲淹叅知政事却令舉正復入樞密府朝廷大臣不失進退之體臣切謂舉正軟懦無能豈可却令入樞府雖中書總天下之事重于樞密院專講兵謀豈可用不才之人也臣聞人主之御羣臣稱職

者用之不職者去之舉正預政以來有何建明著于時
論儻不以罪斥而以恩罷其為幸也大矣伏惟陛下天
資仁厚不忍失一大臣之意奈何羌虜皆橫生民已困
兵戈未寧水旱不節嗷嗷四海思望休息急於用才之
日陛下雖欲存小惠宰相雖欲庇同列豈不誤國家大
計乎伏望陛下發乾剛出聖斷退舉正用仲淹以答天
下之望臣為諫官論列大臣先當議其才與不才若舉
正過惡未欲盡言願朝廷早以禮去之無令醜迹暴揚

於事為便

論李淑梁適姦邪

臣伏見李淑罷開封府中書舍人充翰林學士諫官已有論列李淑行迹姦邪醜惡不宜在天子左右皆陛下素所知者而天下之人未知朝廷如何處之臣聞至聖之主至治之世邪人不能為患猶必去之舜有功二十登八元八凱去四凶也以舜之明雖有四凶在朝豈能害舜之治然必去之者不可使邪人在側使天下之人

皆曰為行如此猶在天子之側誰肯修身潔行以為忠良以此知邪人雖不為害猶以當去之況能為害乎自古帝王非不能知邪人不去終為大患然有因循不去者亦有以也一曰不明雖知心之惡邪人而不能辨邪人之謂也二曰不忍邪人善為巧佞君雖知之而不忍去之之謂也今李淑姦邪朋附有尸鬼之名聞于天下伏況陛下智照明了之纖毫盡見淑之為行無不諳悉非不辨邪人也臣每進對之時陛下嘗謂臣曰奸邪去

則朝廷之福以此定之又非陛下樂聞巧佞之言而不
忍去之也所以不去者必以無實罪故也臣請論之有
實功有實罪而賞罰不疑也有司奉行者無實功而賞
無實罪而誅唯聖人自能別之有實功而賞者戰獲多
少財利豐寡是也有實罪而罰者殺人受賊之類是也
無實功而賞者節行是也無實罪而罰者奸邪是也是
故聖人之議賞罰者賞節行在實功之先罰奸邪在實
罪之上故舜登八元八凱去四凶而曰大功非聖人不

能為之臣力詆姦邪世人以臣不思後患為臣寒心笑
臣愚魯臣自知甚明苟利國家豈顧後患哉臣不愛身
惟憂朝廷不即施行耳奸邪不去正人退縮此正可痛
心也李淑梁適皆有實罪如臣輩所謂者只乞與外郡
有何難行若大臣者有專權之嫌有後患之畏不敢明
言去之陛下何所憚而不為願陛下為社稷為生靈留
意幸甚取進止

乞降呂夷簡致仕官秩

臣竊聞司徒呂夷簡致仕朝廷除太尉者臣竊以呂夷簡立性姦邪欺君賣國出入政府二十年二虜憑凌百姓困窮賢愚失序賞罰不明一無功勞以病罷退陛下未能誅戮勸厲後人豈當濫推恩禮縱取笑天下其呂夷簡麻詞乞不賜降下別令中書詳議官秩取進止

端明集卷十七

欽定四庫全書

端明集卷十八

宋 蔡襄 撰

奏議

乞罷晏殊宰相

臣等竊以宰相之職代天工斷國論鎮撫夷夏表則官師非有經綸之才廉正之德而居之者是謂失其所任然當中外多事之時苟能盡心竭力以濟公家之急縱

有不逮人或恕之而敢不恤物議務營私產與細民爭利推其為心豈可相天子而率百僚也臣竊見宰臣晏殊自登樞府及為宰相首尾數年不聞奇謀異略以了國事唯務私家營置資產見于蔡河岸上託借名目射占官地蓋屋僦賃以宣借兵匠外多占外州軍人日夕苦役怨譴之言聞於道路臣等謂今年以來災孽相仍盜賊繼作內有百萬驕冗之卒而不能更其法下有億兆愁苦之人而不能寬其力盜賊屢動延及嶺南虜使

交來事緒未已河決於北海兵叛於邊城觀此事勢大
臣之責其過均矣然晏殊當此憂危之時恬然自安窺
圖小利此於大臣中尤見其所為之謬也臣等聞唐高
宗朝中書令褚遂良賤買中書譯語官地為御史彈奏
貶同州刺史又聞太平興國中宰相宋謀與宣徽使張
禹錫互請官中郎第太宗皇帝鄙其不識廉恥宋謀以
本官罷免二人當朝廷無事於官司有所營取尚行貶
降今日中外人心憂危殊為輔相既不能了得大計又

占射官地役苦軍人日趨數十錢之資情狀如此豈可
尚容于廟堂也伏惟陛下以祖宗社稷之大天下生靈
之重久付已為失任加之營私忘公無所愧畏臣等伏
乞陛下特出英斷罷免晏殊別求賢才以救時弊取進
止

乞責降馮承用

右臣伏見勾當御藥承用為御史臺彈奏受作坊副使
勾當北園者臣竊以承用小入憑威恃勢久招物論致

有抨彈固宜竄逐以示勸戒今乃優與使名兼管園囿
是以罪責而遷官任使與無罪同何以示朝廷賞罰至
公之道兼恐依舊出入宮禁事體不便伏乞聖旨特降
於近下官資向外監當庶協公議取進止

再論馮承用王守琪

右臣今月初一日伏為入內供奉官勾當御藥院馮承
用轉西京作坊副使勾當北園臣為承用倚威恃勢久
招物論乞降近下官資向外監當至今承用尚在京師

且承用既以事責却自入內官供奉官轉一資何以明
勸戒之道臣竊聞馮承用曾受供帳庫使知磁州王守
琪青馬一匹却安排侍御郭氏嫁與守琪為妻且郭氏
在內中執侍之人雖得出適承用出入官禁豈可受守
琪之馬後以郭氏嫁與為妻守琪陛下之廷臣豈可交
結承用敢娶郭氏瀆紊彝章中外傳聞虧損國體其王
守琪馮承用各無恭畏之禮罪當誅戮乞送馮承用王
守琪下御史臺根勘因依以正刑典臣備位諫官度事

之有所損益者乃敢論列期於必行今承用未寘刑書
臣不得默默而已也

乞罷陳執中參政

臣伏聞制命以陳執中參知政事雖衆議喧然咸謂不
當臣慮傳聞未審未敢指名奏論尋於今月二十六日
夜蔡某向入劄子稍緩其事容臣等上殿奏論次日不
蒙指揮是陛下以所命得人不吝論列臣致均聞聖意
以執中建皇儲之議以為有功故復大任也臣見前代

以來人臣建皇儲之議者誠為難事或因後宮爭寵次序未分或由皇子衆多材德相遠人臣逢此時建大策力排羣議者誠為有功也真宗皇帝獨有陛下一下子天下之心固自系望皇儲之立非陛下而誰但以幼年未行冊命又豈待人臣建言而後定也執中於當年上言正是窺先帝之意自圖富貴又豈為功邪伏況陛下寵遇執中擢居西府西事之始處置乖方如要排牆殺元昊使人又明降宣命令邊臣入界打虜致得元昊來攻

延州援軍殺將為國大恥皆執中之過也兼執中賦性
強狠不容同列商議遂致如此敗事陛下明其有過尋
已升去及任陝西又以無功而罷自專州責務嚴刻以
科斂一向殘暴此固衆人共傳也才性如此豈可置之
廟堂況今天下多事生民困苦天地災異中外憂惶正
要任用才能之時陛下但以執中曾有建儲之言不念
強狠害事任之政府此乃牽私之意安可副天下之望
臣伏乞陛下追罷執中前命別用才能如以臣言為非

乞行竄逐

乞罷呂公綽糾察在京刑獄

臣竊見呂公綽先任三司判官後因父夷簡在中書避嫌不就省職遂同判太常寺太常寺舊無同判之名為公綽特置名目近聞本寺失去編鐘四百有餘為寺中執役之人盜賣公綽主判理合坐罪却差糾察在京刑獄臣竊見宗正寺曾因失物主判趙良規坐罪出補外任況茲樂器人主郊天祀廟會朝崇禮之器豈容竊去

而主判之官並不問罪又遷升糾察刑獄之任顯是公
綽明知本寺失鐘事重輒求解罷要作去官若以前因
避嫌自夷簡罷相公綽却合入三司判官若以在館歲
月頗深見在資歷深如公綽者不少近曾因父罷相賜
紫又授修撰為臣寮論列尋已罷去今轉更僥求足驗
全無廉恥其呂公綽失鐘之罪伏乞朝廷推至公之典
劾正其罪依趙良規例施行所有糾察在京刑獄勅書
伏乞追寢

再論呂公綽

右臣近為呂公綽同判太常寺失去樂鐘至多並不問罪却除糾察在京刑獄臣伏劾正其罪依趙良規例施行所有糾察勅書亦乞追寢未蒙朝廷施行臣待罪諫官所言悉皆公論如呂公綽其父夷簡執政之日公綽倚勢賣權欲施一恩則預作因緣欲行一事則先露風旨若以外人所議直是貨賂交通為宰相之子而暗擅威福之名著貪恠之迹為陛下之臣豈復有恭畏之心

乎操履若斯豈臣過論况夷簡作相日久舊恩徧滿朝
中或欲屈法以訾公綽之愆或欲遷官以酬夷簡之惠
伏惟陛下持大公之柄宰天下之平示公綽均于百官
何以恣其僥倖若朝廷以公綽失鍾之罪為輕其糾察
在京刑獄之任即與追寢別與閒慢差遣若公綽不合
陳論乞加妄言之罪使天下知是非有歸不可空已也

乞罷魏蕪館職

臣風聞前淮南轉運使魏蕪先自兩浙安撫回來以有

旨候令任滿之日與直史館者臣竊見前來遣安撫使
諸路巡察惟魏兼最為狼籍是時杭越蘇秀諸州旱澇
連年疫癘相屬富者疾疫貧者流亡哭聲震野餓屍橫
路魏兼專銜恩命往布德音不能悉心撫恤以副陛下
焦勞之念輒敢恣情晏樂以斂百姓脂膏至蘇州留止
三日窮徹晝夜歌樂娛遊本州盡驅饑民藏于祠廟三
日拘束飲食無得殍死多隔年論旱詞狀一程至吳江
方得收覽諸州望風悉遣妓樂隔州迎候睦州送至桐

廬至有樂人溺死蘇州民謠刊板傳誦臣略得兩句云
繞梁歌妓唱動地饑民哭杭州刻安撫夜飲圖賣於都
市醜聲惡語傳於道路緣魏兼與宰臣章得象晏殊並
是親戚當時無人疏兼罪狀請加誅以謝吳人不惟苟
免過尤仍有館職之命伏以賞罰之柄國之大經今無
功而行賞已可痛心況以罪而加賞乎上下蔽蒙紀綱
隳壞靡不由此魏兼上無畏法之心而下無恤民之意
縱有任使焉肯盡忠所有館職之命伏乞寢罷或降與

小郡以厲後人

乞責罰醫官

臣竊見近寶和光公主及公主相繼夭殤供藥醫官已聞下開封府取勘者臣切知豫王鄂王薨時醫官亦是取勘只降一兩官未旬月間尋得牽復切慮今來亦只似此行遣久遠不便況近來小兒醫官不一二年起升官資賞賜無數奏薦異姓恩澤過于兩制臣僚賤者立貴貧者立富若以生死有命藥餌難工自來所醫疾病

盡是當痊愈此等何故濫受恩賞恣為僥倖若以從來
痊愈因藥合受恩賞今日所醫無驗自當伏就刑罰臣
竊聞先朝周王薨其時醫官李某杖配廣南陛下二
年間皇子皇女繼亡六人盡在此輩數人之手兼臣聞
醫官各是臨病互相推托不肯及時下藥以致病深雖
有良醫無由措手其罪至重比於李某合更加刑其術
至謬求之今人不為難得伏望陛下念祖宗社稷之重
特因此時深行刑罰庶使後人知懼藥餌盡心實為久

遠保育皇嗣之計

乞商稅院不用賊吏

右臣伏見在京倉場庫務有條舉官監當去處近年多是大臣之家陳乞子弟監當就便勾當家務臣竊以外州軍場務錢數三萬貫以上及茶鹽轉般倉等並是舉官監當蓋朝廷以官物出入必在擇人今京師倉場庫務受納天下所輸之物招來四方商賈之資計利最多號為繁重却陳乞監臨未為便先臣非謂大臣子弟例

皆不肖益守官者憑恃勢要不肯盡心監司者護惜顏
情不能糾劾不如泊場布庫在藏庫等處侵欺盜竊相
繼敗露其餘損壞官物不可勝數今陛下或無名費及
千緡有司必以為不可至於監當損壞官物監當萬計
因循不問大可怪也竊見李壽明監商稅院為無名收
稅非理勾追市肆之間號為撓擾三司不時糾舉却止
出榜曉示本家懼見彰露乞降除近郡通判既有見闕
三司依例舉官朝廷却除陳執禮監當臣竊聞陳執禮

先曾犯贓追停今來為王欽若家先曾陳乞便與填闕
況都商稅京師商賈出入所收謂利萬數不少贓汙之
吏豈堪其任臣乞下三司詳定若于倉場庫務合係舉
官監當所舉之官並委三司舉曾歷外任無贓汙之人
更不在臣寮陳乞之限若一任內有犯入已贓乞坐所
舉之人竝與同罪施行所貴局務得人不至枉壞官物
其陳執禮亦乞別與差遣

乞用韓琦范仲淹

臣伏見去年已來陛下拔任諫官都下翕然稱慶又數
日罷夏竦樞密使用韓琦范仲淹作樞密副使制命一
出士大夫賀于朝庶人憙于路至有飲酒叫號以為樂
者謂陛下去邪任忠可刻日以觀太平矣臣聞易泰之
象詞曰內君子而外小人君子道長小人道消否之象
詞曰內小人而外君子小人道長君子道消然則君子
進則天下泰小人進則天下否陛下退一邪臣進一賢
人而舉國歡欣者豈以一邪一賢獨能關天下利害乎

蓋以一邪退則其類退一賢進則其類進衆邪並退而衆賢並進而天下不泰者無有也雖然臣竊憂之頃年莊獻明肅太后初棄六宮陛下親臨庶政一日出令邪臣沮氣天下觀聽灑然快意期于一變以臻大治自後數年內方無事左右之臣易於襲常而恬於苟安陛下憂勤之心且亦少懈已而西羌背違舉兵寇邊遣將興師屢戰屢敗饋運賦斂百姓困窮北人乘勢窺我強弱遣使求地京師震駭幸而增賂以得暫息四海嗷嗷日

憂一日以將來之患當何如也然猶惜忠賢之士而屬望焉幸而進用庶其叶力而大有為以解焦勞之急陛下奮發剛斷博采物論拔而任之人人歡欣而臣獨竊憂者誠恐進用之後或有讒間或拘舊例使之不盡所長而去則天下必有遺材之恨所損不細矣當今天下之病臣請譬諸病者其安時調養適宜固不病矣病在皮膚醫者能早去之病且安矣此二者皆已不及而病在支體若得良醫之時陛下又選任良醫儻信任不疑

聽其施設非徒愈病又致民於壽若於此時使良醫不
得盡其術則天下之病深雖有和扁之妙難責速効矣
願陛下思祖宗社稷之重矜四海生民之困憤西北二
虜之恥發乾剛夬決之道拔賢材收衆策不憚改作以
成大功天下幸甚幸甚臣昧死再拜謹上

端明集卷十八